

CARNIVAL 60 2014



No ban warda, te ora e baca hoga, ban salba e parada di Noord

ORANJESTAD- Ami a bishita St Aloysius School na Noord y mi ta corda cu nos scol tawata contribui na e Parada di Noord, sea como participante y tambe cu musica, na unda cu St Aloysius tawata tin su Steel Pan band den parada tambe. Ainda mi ta corda cu nos a yega di bay como " Los Pica Piedras (The Flintstones)". Despues di asisti scol basico y sigui pa scol secundario, mi ta corda cu bo mester yega trempan e mainta di Parada, pa bo haya un bon luga, pa wak e parada pasa, sino, ta lomba di hende bo lo wak. Tawata tin aña, cu nos tawata reserve nos luga un of mas dia prome caba. Awor tin luga suficiente pa staciona un bus completo y lamentablemente na final ta un grupo chikito ta wak e lastlap yega.

Nos grupo; Freezone Gang(di Sabana Liber), tawata mik semper pabou di e muraya di Imelda Hof (otro banda di caminda), na unda cu nan ta bende pisca awor. Mi ta corda cu bo ta bin topa casi e mesun hendenan, na casi e mesun spot, tur aña. Mi ta corda famia Wolf, Giel, Gil, d'Aguiar, Faro, Britten, Brete, Everon, Web, Figaroa, Trompnan y hopi otro cu ta mucho pa menciona.

Nos ta celebrando Carnaval 60 (oficialmente) y durante e 60 añanan ey, Noord sigur a contribui cu su parada. Mi a ripara cu durante e ultimo 2 periodo di eleccion (Parlamento), politiconan ta bin campaña tambe durante e parada di Carnaval di Noord y tur dos biah, mi a menciona na e diferente politiconan ey, mi preocupacion cu e situacion cu e parada di Noord ta disminui y cabando cada aña mas y mas. Claro mi a papia tambe cu diferente figuranan importante di Carnaval cu ta den e comision di Noord y tambe di SAC. Mi a splica nan e motibo pa kico e Parada di Noord ta cabando y ta masha facil di compronde. Tanten cu



e "Ligting Parade" ta ariba e mesun dia cu e Parada di Noord, e interes pa participa y mira e Parada di Noord, ta keda bira menos. E situacion ta facil tambe pa splica. Dia cu nan a introduci e combinacion aki, e "Parada di Luz, tawata algo hopi luhoso y na unda cu ta miembronan of hendenan directamente vinculo cu Tivoli Club, tawata participa. Pues e tempo ey, den e participantenan di Parada di Noord, lo por tawata tin un grupo hopi chikito cu lo por a participa tambe cu e Parada di Luz y pues, e combinacion ey, no tawata stroba e otro. Awor cu un par di aña atras,

e Lighting Parade a stop di limita su participantenan, na unda cu tur hende por participa y cu menos luho, cu e consecuencia cu e grupo di participantenan di e Parada di Noord cu ta participa na Parada di Luz tambe, lo a bira hopi mas grandi. Esaki ta trece cun'e, cu hopi hende ta prefera di "no " y no participa cu Parada di Noord y tambe descansa pa bay wak e Lighting Parade cu tin mas participante y sigur lo tin mas hende conoci y/of familiar cu lo ta den e Parada di Luz.

Na diferente ocasion mi a haci un peticion pa separa e dos paradanan ey, prome cu

ta laat y mi ta kere cu awor si a yega e momento. Mi a bisa tambe e comision di Carnaval Noord y diferente hendenan di SAC. Hopi ta/lo bisa cu no tin espacio, mirando cu e tempo lo no duna, pasobra e tur diasabra lo ta ocupa. Wel, un otro sugerencia lo ta, si Parada di Luz di San Nicolas lo por wordo haci den siman, di con e Lighting Parade na Oranjestad, NO lo por den siman ? Nos lo por modernisa e parada y invita e turistanan cu ta huesped den e hotelnan na Noord y claro cu apoyo financiero, pa cubri e gastonan di un of mas banda, di e propio hotelnan, pa laga nan huespednan partici-

pa den e parada. Y no lubida cu Noord ta bay conta cu un MAVO/HAVO-school tambe y pues conhuntamente cu tur e organisacionnan social, clubnan deportivo, e schoolnan basico y secundario cu ta situa den Noord y vecindario, nos lo por haci e parada di Noord, bira esun di antes atrobe, esun cu semper nos ta orguyoso di dje.

NO BAN WARD A E BACA HOGA, PA NOS BAY DEMPEL E POS !!

Jairzinho "Jair" Tromp
Miembro activo di Freezone Gang (FZG)
Sabana Liber, Noord. □